

# INUIT ATAQATIGIIT

## INATSISARTUNI



UKA 2013/20.1  
7. november 2013  
Aqqaluaq B. Egede

### **Inatsisartut taakkulu allaffissornikkut immikkoortuisa illussaannik nappaanissamat Siulittaasoqarfiup pilersaarusiaanut Inatsisartut tapersiinnaannut aalajangiiffigisassaattut siunnersuut.**

(Inatsisartut Siulittaasoqarfiat: Lars Emil Johansen, Agathe Fontain, Kim Kielsen, Ane Hansen aammalu Finn Karlsen)

Nunatta aningaasarsiornikkut sukateriffiqeqartariaqarnera tamanit ilisimaneqalereerpoq. Pisariaqarpoq inuiaqatigiit atugarissaarnerat attanniarsarissallugu. Atugarissaarnermillu attassiinnarumanerput aningaasanik naleqarmat, inuiattut aningaasartuuteqarfigisavut annikillisinneqarsinnaasut piaartumik akisussaassuseqartumillu suliarinissaat pisariaqarpoq.

Inuit Ataqatigiit naalackersuinikkut sulinitinni qitiutinniarsimavarput aamma timitalerniarsimavarput inuiaat kalaallit aningaasarsiornikkut akiliisinnaassuseqartut imminullu napatinnissamik siunertaqarlutik aqutseriaaseqartut pilersissallugit. Tamanna politikikkut sulinikkut timitalerniassallugu unammillernartut arlaqarput. Unammilligassat ilagaat politikikkut siunertat inuiaqatigiinni paasiuminaassinnaasut nuannerpallaanngitsullu, kisianni atuutsilissallugit pisariaqavissut piviusunngortinnissaat.

Tamatuma akerleraa inuiaqatigiinni nutarterinissamat siuarsaanissamullu tunuarsimaarneq, nikeriarnaveeqqaneq, akilersinnaanerusumillu ingerlatsinissaq alloriarfiginagu pissusitoqqanik attassiumaneq. Taamaassanngilaq. Inuiaqatigiittut aningaasaqarnitta siuariartortinnissaa akisussaassuseqartumik suliaassamat, siunnersuut una Inuit Ataqatigiinnit ilanngullugu isummersorfigissavarput. Aamma partiit akornatsinni naaperiarfissanik siunnersuuteqarfigissavarput.

Nunatsinni inissiat aserfallassimasut takussaaleriartornerat assigalugu, Namminersorlutik Oqartussat allaffeqarfiat, tassa inuiaqatigiit allaffissuat aserfallalluinnarpoq. Ukiuni arlaqalersuni Inatsisartunut ilaasortat, allaffinnilu sulisut peqqissutsikkut pitsaanngitsumik sunnersimaneqarnerat sakkortusiartupiloortumik sunniukkiartorpoq. Namminersorlutik Oqartussat allaffeqarfiata aserfallakkiartupiloornera ukiuni arlaqalersuni annertusiartuinnartumik nutartertariaqartarmat, inuiaqatigiinnut aningaasarpassuarnik naleqartunik nutarterneqartarpoq.

Allaffissuarmi maani sulisut nussortaqaattaarnerat piffissamik annertuumik tiguisarpoq. Piffissap ingerlanerani Inatsisartut ataatsimiinnerat Sermersuup kommuniata ataatsimiittarfiani ingerlattariaqartarnikuuagut. Allaffissuup massuma avataani allaffinnik arlalinnik attartornerit pisarnikuupput. Nutarterinerillu kingorna Inatsisartunut ilaasortat aammalu allaffissuarmi sulisut peqqissusaannut sunniutaasartut pitsaanngitsut suli sakkortuumik sunniuteqartut paasinarsivoq. Naak aningaasarpassuit atorlugit nutarterinerit arlallit ingerlanneqareeraluartut.

Inuit Ataqatigiit Inatsisartut siulittaasoqarfiat aqqutigalugu suleqataanitsigut aqqiissutaasinnaasut assigiinngitsut arlallit misilittarsimagaluarpagut, aningaasarpassuillu atorlugit nutarterinerit ukiut tamaasa pisaraluartut, suli ajornartorsiutaasartut allanngorsimannngillat. Taamatut ingerlatsineq attatiinnarneqassappat inuiaqatigiinnut akilersinnaanngilaq. Akilersinnaanerusorlu tassaannngilaq, ukiut tamaasa nutarerineq, allaffeqarfiillu assigiinngitsut akornanni nuttartitsineq.

Taamaakkaluartoq Inuit Ataqtigiit ilisimalluinnarparput nunatsinni inissiat amerlasuut aserfallalluinnarsimasut. Aserfallatsaalisassallu kinguaattoorutit ima annertutigilersimapput, allaat koruunit mia. arlallit aserfallatsaaliinissamut kinguaattoorutinngorsimallutik. Naak ukiuni arlalinni sanaartornermut aningaasaliissuteqarneq ingerlajuaraluartoq, nalunngilarput oqok annertuumik ajornartorsiutaasoq iliuuseqarfigisariaqartorlu. Ukiut ingerlaneranni ilaqutariit angerlarsimaffiit aserfallatsaalineqartariaqartunut aningaasat kinguaattoorutit annertusiartorput.

Inuiaqtigiinni inissaqarniarnikkut atugassarititat akuersarneqarsinnaanngillat. Inuit Ataqtigiit isumaqarpugut akisussaaqtigiilluta ajornartorsiutip aaqqiissuteqarfigineqarnissaa suleqatigiissutigisinnaagipput. Soqutigaarput Inatsisartuni partiit akunnerminni suleqatigiillutik ajornartorsiut pillugu siunissamut tasitamik aningaasalersuinissaq ataatsimoorussa q angusinnaassagipput.

Inuit Ataqtigiit Inatsisartuni partiit akornanni oqaloqatigiinnissamut ammaasserusuppugut naalakkersuisooqtigiit partiivinut suleqatigiinnullu. Siunnersuutigaarput Inatsisartut Aningaasanut Inatsisaanni konto-mik nutaamik pilersitsisoqarsinnaanera isumaliutigineqarsinnaasoq. Konto immikkut siunissamut aningaasaliissutinik pilersitsisoq aqqutigineqassasoq isumaqarpugut.

Kontop pilersinneqartup qulakkiissavaa Namminersorlutik oqartussat allaffeqarfissaanut aningaasaliissutissat. Tassani ilanngullugu isumaqatigiinniutigerusupparput, partiit akornanni anguniarneqartoq piumaneqartorlu, tassalu siammasissumik sanaartornissamik timitaleeqataassasoq Utoqqaat Illuinik nutarterinermut, inissianik oquttunik aserfallassimasunillu nutarterinermut, meeqqat atuarfiinik nutarterinermut. Qitiutillugu inuiaqtigiinnut akitsoriartuinnartumik pinngitsooratik aningaasartuuteqarfiusariaqartut kinguaattooriartorfiusullu aningaasaliiffineqarnissaat. Siunnersuut taanna oqaloqatigiissutissatut kaammattuutigaarput.

Inuit Ataqtigiit takisuuliunngikkaluarluta Inatsisartut siulittaasoqarfiata aalajangiiffigisassatut siunnersutaa isumaqatigaarput. Inassutigissavarpullu Inatsisartut ataatsimiititaliaani susassaqtumi suliarineqassasoq.